


16 AUGUST

**ACATISTUL
MAHRAMEI
DOMNULUI**

ACATISTIER-RU



Акафист

Нерукотворному образу Господа Иисуса Христа

Кондак 1

Пречистому Твоему Образу покланяемся,
Благий, просяще прощения прегрешений
наших, Христе Боже, волею бо благоволил еси
плотию взыти на Крест, да избавиши, яже
создал еси, от работы вражия, тем с надеждою
вопием Ти:

Господи Боже, Спасителю мой, прииди ко мне
погибающему и исцели болезни моя
неисцельныя.

Икос 1

"Иисусе, Спасителю мой, – молил смиренно
Авгарь князь Едесский, – прииди ко мне и
исцели неисцельныя болезни моя, в нихже от
многих лет стражду". Ему же подражая, и аз,
пораженный греховною проказою, мольбою
вопию сице:

Господи мой, Господи, помилуй мя по велицей милости Твоей, и по множеству щедрот Твоих очисти беззаконие мое.

Господи Спасителю мой, росой милости Твоей омой мя от беззакония моего, и от греха моего очисти мя.

Господи, отврати лице Твое от грех моих и вся беззакония моя очисти.

Господи, сердце чисто созижди во мне и дух прав обнови во утробе моей.

Господи, не отвержи мене от лица Твоего и Духа Твоего Святаго не отыми от мене.

Господи Боже, Спасителю мой, прииди ко мне погибающему и исцели болезни моя неисцельныя.

Кондак 2

Видя любовь и веру Авгаря Едесскаго, Господи, Ты писал еси ему "Блажен еси Авгарь, не видевый Мя и веровый в Мя. Аз пошлю ученика Моего и той исцелит тя и жизнь вечную подаст ти и сущим с тобою". Посли же, Господи, милость Твою и мне вопиющему: Аллилуиа.

Икос 2

Разум не постигает тайны, как Господь приложением к Божественному лику Своему убруса, изобрази на нем подобие Свое, посылаше оное к Авгарю, желание того исполняя. Сей же радости великой исполнься, поклонися образу Христову. Ему же и мы с благоговением днесь поклоняемся, с мольбою и верою зовуще:

Господи мой, Господи, устне моя отверзиши, и уста моя возвестят хвалу Твою,

Господи мой, Господи, возврати ми радость спасения и Духом Владычным утверди мя.

Господи, Тебе Единому согреших и лукавое пред Тобою сотворих, по милости Твоей пощади мя.

Господи мой, Господи, Спасителю мой, призри на скорбь души моя и поспеши на помощь мне.

Господи мой, Господи, услыши мя и от всех скорбей избави мя.

Господи Боже, Спасителю мой, прииди, ко мне погибающему и исцели болезни моя неисцельныя.

Кондак 3

Силою любви и радости преисполненный
поклонися Авгарь Нерукотворенному образу
Спасителя мира и, получив своих болезней
исцеление, с верою воззва "Христе Боже, всяк
уповающий на Тя не постыдится". Сим поучая и
нас всегда уповати на милости Господни и пети
Ему: Аллилуиа!

Икос 3

Имея любовь к падшему роду человеческому,
Ты, Христе Боже, чрез единого от учеников
Твоих воззвал еси Авгаря от мрака греховного и
просветил душу его светом истины Твоея.
Воззови и меня от глубины греховныя, да и аз с
плачем возопию Тебе сице:

Господи мой, Господи, даруй ми слезы умиления,
да ими Тя умолю – очисти прежде конца вся моя
прегрешения.

Господи, просвети мою душу светом Твоего
Божественнаго познания, и введи мя по милости
Твоей в Царство Твое.

Господи мой, Господи, просвещение мое и
Спаситель мой, к Тебе прибегах, научи мя
творити волю Твою.

Господи мой, Господи, Боже мой, вразуми сердце мое, и отжени от него искушение лукаваго, и настави мя на путь спасения.

Господи мой, Господи, не отрини убо моления моего и услыши мя, Твоею Благостию утверди сердце мое страхом Твоим.

Господи Боже, Спасителю мой, прииди ко мне погибающему и исцели болезни моя неисцельныя.

Кондак 4

Буря страстей и треволнений житейских потопляет мя, и сердце, объятное ужасом смерти, вопиет Ти: Господи, несть помогающаго ми на земли, спаси мя, якоже древле Авгаря, и даруй купно с ним пети Ти: Аллилуиа.

Икос 4

Слыша, яко иудее ненавидят Тя, и хошут нечто злое содеяти Тебе, Господи, пишет Авгарь: "Аз молю: прииди ко мне и обитай со мною". Того любви подражая, и аз, восстав из глубины падения моего, дерзновенно молю Тя, Христе Боже, сице:

Господи Боже мой, вниди в дом души моея и пребуди неотлучен со мною грешным.

Господи, Боже сердца моего, прииди и соедини мя с Тобою на веки.

Господи мой, Господи, к Тебе прилепилась еси душа моя, прииди и радости исполни сердце мое.

Господи Боже, Спасителю мой, прииди ко мне погибающему и исцели болезни моя неисцельныя.

Кондак 5

Благословен грядый во имя Господне – воспеваху древле дети еврейскийи, встречая Господа в Иерусалиме. Мы же днесь, раскрывая двери сердец наших грядущему к нам Спасу, со умилением зовем: Аллилуиа.

Икос 5

Дивныя глаголы Ты рекл еси, Господи, всем погибающим: "Да не смущается сердце ваше, и да не устрашается, веруяй в Бога, и в Мене веруйте и наследите Царство, уготованное вам от создания мира". Аз же, помышляя свое беззаконие, молю Тя, Блаже, утверди сердце мое и просвети ум мой, Тебе вопиющий:

Господи мой, Господи, призри на мя и просвети очи мои, да не усну в смерть.

Господи мой, Господи, путевода Израиля от земли фараоновой, настави мя на путь Твой, да пойду во истине Твоей.

Господи Иисусе Христе, Сыне Божий, верую в Тя, помози моему неверию.

Господи мой, Господи, да не яростию Твоею обличиши мене, и не удаляйся от мене за беззакония моя.

Господи Боже, Спасителю мой, прииди ко мне погибающему и исцели болезни моя неисцельныя

Кондак 6

Воззрети очима на образ Твой, Господи, не смею окаянный аз от лукавых моих деянии, но яко мытарь, стена, взываю Ти: Боже, очисти мя грешнаго от фарисейскаго лицемерия и научи чистым сердцем пети милосердию Твоему: Аллилуиа.

Икос 6

Возсия в скорби моей утешительное слово Твое, Спасителю мой, еже рекл еси: "Не оставлю вас сиры, прииду к вам". Того ради аз, избегши темноту отчаяния, с надеждою на Твое человеколюбие прибегах к Тебе сие моляся:

Господи мой, Господи, Прибежите мое в беде и в скорби, не остави мя едина.

Господи мой, Господи, безгрешный, с беззаконными вмененный, изми мя от рук ненавидящих мя.

Господи мой, Господи, от поругания видимых и невидимых врагов сохрани мя.

Господи мой, Господи, прости мя и прими мя, якоже блуднаго древле во объятия Твоя.

Господи Боже, Спасителю мой, прииди ко мне погибающему и исцели болезни моя неисцельныя.

Кондак 7

Дивныя показал еси дела Твоя, Господи, в пречистем образе Твоем и чудности даровал утешение всем земнородным, научив их в скорбных обстояниях жизни прибегати к Твоему милосердию и пети Тебе с любовию: Аллилуиа.

Икос 7

Храм носяй телесный весь осквернен, множество содеянных мною лютых, трепещу страшнаго Суднаго дне и молю: покаяния отверзи ми двери, Жизнодавче, и яко Давид вопию Ти:

Господи мой, Господи, услыши моление мое, внемли молитве моей и помилуй мя.

Господи Боже мой, Твой семь аз, вразуми мя и жива будет душа моя.

Господи Боже мой, пастырю мой, заблудих, яко овча погибшая, взыщи раба Твоего и спаси мя.

Господи мой, Господи, помилуй мя, исцели душу мою, яко согреших Тебе.

Господи Боже, Спасителю мой, прииди ко мне погибающему и исцели болезни моя неисцельныя.

Кондак 8

Страшнаго дне пришествия Твоего ужасаюся, Христе, и трепещу, яко имый множество согрешений, но Ты, Милостивый Боже, прежде конца обрати мя, поющего Ти: Аллилуиа.

Икос 8

Весь был еси любовь к падшим человеком, о Иисусе, и даровал еси им образ Твой Святой, ясно глаголющий всем в скорби и печали сущим: "Приидите ко Мне, вси труждающиеся и обремененнии, и Аз упокою вы". Сего ради погибающий, со дерзновением молю Тя, Христе, сице глаголя:

Господи мой, Господи, хранителю мой, сохрани
меня от врагов, нападающих на мя.

Господи мой, Господи, в вышних живый и на
смиренья призираяй, призри на мя грешнаго и
буди отрадой моей.

Господи мой, Господи, спаси мя, утопающего в
пучине житейских искушений.

Господи мой, Господи, да не смущается сердце
мое и да не устрашается во исповедании имени
Твоего.

Господи мой, Господи, прими мя, яко мытаря,
яко Хананею помилуй, помилуй мя по милости
Твоей.

Господи Боже, Спасителю мой, прииди ко мне
погибающему, и исцели болезни моя
неисцельныя.

Кондак 9

Вси языцы, приидите, с любовью и трепетом
поклонимся пречистому образу Спасителя мира,
избавльшему нас от работы вражия и
благодарственно вопием Ему, Победителю
смерти и ада: Аллилуиа.

Икос 9

Весь пораженный проказою греховною,
недоумеваю, како есть достойно величати Тя, о
Владыко многомилостивый, но верою сердечною
исповедую Тя, истиннаго Сына Божия,
смирненно стою пред образом Твоим Святым,
сице моляся:

Господи Иисусе, Радосте моя, даждь ми, да
возрадуюся о милости Твоей.

Господи, Спасителю мой Преблагий, спаси раба
Твоего от неверия и беззакония.

Господи мой, Господи, Милость неизреченная,
благодатию Твоею потреби гнев в сердце моем.

Господи мой, Господи, чистота неописанная,
чистоту сердца и ума даждь ми.

Господи мой, Господи, одеяйся светом яко
ризою, освяти мя, печальми житейскими
омраченнаго.

Господи Боже, Спасителю мой, прииди ко мне
погибающему и исцели болезни моя
неисцельныя.

Кондак 10

Господи мой, Господи, милосердый Спасителю мой, душу мою студными деяниями люте расслабленную воздвигни Божественным Твоим милосердием, якоже древле расслабленнаго при овчей купели, и на спасения стези настави ю, да поем Ти: Аллилуиа.

Икос 10

Царю Предвечный, Утешителю, Христе Истинный, очисти мя от всякия скверны, якоже очистил еси десять прокаженных и исцели мя, якоже исцелил еси сребролюбивую душу Закхея мытаря, да воспую Ти, сице глаголя:

Господи мой, Господи, недуги наша приемый и болезни понесый, исцели болезни сердца моего.

Господи мой, Господи Иисусе, Помощниче мой, помози ми, яко изнемогает душа моя от скорби сея.

Господи мой, Господи, очи давый слепому во еже видети, даждь ми око, да узрю кротость и терпение Твое.

Господи долготерпеливый, избави душу мою от нечестиваго и спаси мя ради милости Твоея.

Господи Боже, Спасителю мой, прииди ко мне
погибающему и исцели болезни моя
неисцельныя.

Кондак 11

Пение всеумиленное Тебе приносяща, и
сокрушенным сердцем молящася, не презри мя,
о Преблагий Владыко! Отврати убо лице Твое от
грех моих! Но не отврати лица Твоего от раба
поющего Тебе: Аллилуиа.

Икос 11

Христе Свете истинный, просвещаяй и
освящаяй всякаго человека грядущаго в мир,
призри на мя, грешнаго и непотребнаго раба
Твоего и исправи жизнь мою по заповедям
Твоим, и душу мою освяти, да принесу Ти
молитву сице:

Господи Иисусе Христе, Ты Свет мира, светом
Твоим осияй мя.

Господи мой, Господи, Ты источник жизни,
даруй душе моей жизнь нетленную и утверди ю
в заповедех Твоих.

Господи Иисусе Христе, Ты Солнце правды,
правдою Твоею согрей душу мою и озари ум
мой.

Господи мой, Господи, Ты наставник мой, научи
меня творить волю Твою и любить Тя всем
сердцем.

Господи мой, Господи, Ты отверзл еси очи
слепому, отверзи и мне двери покаяния и, яко
щедр, очисти вся грехи моя.

Господи Боже, Спасителю мой, прииди ко мне
погибающему и исцели болезни моя
неисцельныя.

кондак 12

Благодатию Твоею всесильною, утверди сердце
мое в вере, надежде и любви, даруй ми
покаянием и неослабленным исполнением
заповедей Твоих достигнуть Царствия
Небеснаго, идеже с лики апостольскими воспою:
Ти Аллилуиа.

Икос 12

Ты, Пастырю добрый, рекл еси всем, в скорби и
печали сущим: "Друзи Мои, Аз иду ко Отцу
Моему и Отцу вашему уготовити место вам, но
паки прииду и возьму вас к Себе, аще заповеди
Моя соблюдаете". Сему благоговейно внимая,
дерзну и аз, погруженный в лютую скорбь,
приступити к Тебе, сие моляся:

Господи мой, Господи, милосердый Спасителю мой, спаси мя погибающаго.

Господи мой, Господи, отжени от мене тучи неверия, зла и вражды и Духом Твоим Благим настави мя на путь правды.

Господи мой, Господи, утешение души моея, утеши мя в печали сущаго.

Господи Боже мой, имене ради Твоего, оживи мя и правдою Твоею изведи из печали душу мою.

Господи, Царю Пресильный, помяни мя, егда приидеши во Царствии Твоем.

Господи Боже, Спасителю мой, прииди ко мне погибающему и исцели болезни моя неисцельныя.

Кондак 13

О, Премилосердый и Преблагий Господи Боже, Спасителю мой, пришедый в мир для спасения падшаго человека, не возгнушайся мене паче всех человек прегрешившаго и не отврати от мене лица Твоего, но призри на лютую скорбь и печаль души моея, исцели и утверди в свете истины и любви, да поем Ти: Аллилуиа!

О Спасе мой Премилосердый, пришедый в мир для спасения падшаго человека, взыщи мя

погибающего и благодатию Твоею душу мою освяти, тело очисти и жизнь исправи по заповедем Твоим, да воспую Ти чистым сердцем: Аллилуиа.

О Спасе Мой Премилостивый, призри на раба Твоего, утопающего в мори житейских искушений и бед, и, яко же древле Петра утопающа, спаси благодатию Твоею, освяти душу и утверди на стези заповедей Твоих, да чистым сердцем и усты вопию Ти с любовью: Аллилуиа.

(Этот кондак читается трижды. Затем читается 1-й икос и 1-й кондак)